

"(10) Ukoliko neki politički subjekt u Općinskom vijeću prestane biti parlamentaran istupanjem vijećnika koji su bili njegovi članovi, razrješavaju se dužnosti i članovi radnih tijela koje je taj politički subjekt delegirao, a nova raspodjela mjesta u tim radnim tijelima vrši se kako je propisano u stavovima (4), (5) i (6) ovog člana."

Član 11.

U članu 27. iza stava (3) dodaju se novi stavovi (4) i (5) koji glase:

"(4) Članovi radnih tijela ne mogu biti lica koja imaju pravni ili ekonomski interes koji utiče ili može uticati na zakonitost, otvorenost, objektivnost i nepristrasnost u vršenju te dužnosti.

(5) Obavezno je prisustvo jednog predstavnika svakog radnog tijela na sjednicama Općinskog vijeća, a što, na početku sjednice evidentira Stručna služba Općinskog vijeća."

Dosadašnji stav (5),(6) i (7) postaju stavovi (7), (8) i (9).

U istom članu mijenja se dosadašnji stav (7), a sad stav (9) i glasi:

"(9) Zbog efikasnosti rada, mora se voditi računa da, u svakoj komisiji, nadpolovična većina njenih članova, posjeduje iskustvo i stručnost u oblasti koja je u nadležnosti radnog tijela, kako bi komisija mogla davati odgovarajuća stručna mišljenja prema potrebama i na zahtjev Općinskog vijeća."

Član 12.

U članu 31. briše se stav (2).

Član 13.

U članu 32. iza stava (5) dodaje se novi stav (6) koji glasi:

"(6) Prijedlog za razrješenje iz stava (5) ovog člana mogu podnijeti: predsjedavajući Općinskog vijeća, klub vijećnika, radno tijelo ili 1/3 (jedanaest) vijećnika u Općinskom vijeću."

U stavu (6) koji postaje novi stav (7), u trećem redu, iza zarez a se dodaju riječi:

"Čime je ugrožen kvorum za odlučivanje,"
iza zarez a dalji tekst ostaje isti.

Član 14.

Iza člana 49. dodaje se novi član 49a. koji glasi:

"Član 49a

Komisija za rad sa mjesnim zajednicama:

- vrši nadzor nad provođenjem odluka Općinskog vijeća koje se odnose na organizaciju i funkcionisanje mjesnih zajednica,
- razmatra godišnji izvještaj o radu savjeta mjesnih zajednica i druge tačke dnevnog reda vezane za djelovanje mjesnih zajednica, te svoje mišljenje dostavlja Općinskom vijeću,
- razmatra pitanja iz nadležnosti mjesnih zajednica i prati rad organa mjesnih zajednica,
- razmatra inicijative za osnivanje, ukidanje i spajanje mjesnih zajednica i daje svoje mišljenje, prijedloge i o drugim inicijativama upućenim Općinskom načelniku i Općinskom vijeću,
- predlaže mjere za unaprjeđenje rada i organizaciju mjesnih zajednica."

Član 15.

U članu 51. iza stava (9) dodaje se novi stav (10) koji glasi:

"(10) Izuzetno od odredaba propisanih ovim članom, a u cilju zaštite određenih, specifičnih interesa, zbog kojih se klub formira, u Općinskom vijeću se mogu formirati i klubovi vijećnika koji ne podliježu finansiranju u skladu sa Odlukom koja reguliše finansiranje rada klubova vijećnika u Općinskom vijeću."

Član 16.

U članu 55. stav (2) u drugom redu, iza zarez a se briše postojeći tekst i umjesto zarez a se piše tačka.

Član 17.

U članu 60. stav (1), u četvrtom redu, iza riječi "**Federacije**" briše se tekst:

"**iz izborne jedinice Stari Grad Sarajevo**".

Član 18.

U članu 61. briše se stav (3).

Član 19.

U članu 73. iza stava (1) dodaje se novi stav (2) koji glasi:

"(2) **Prije pristupanja glasanju, po svakoj tački dnevnog reda, sekretar Općinskog vijeća utvrđuje broj prisutnih vijećnika i saopštava ga Općinskom vijeću.**"

Član 20.

U članu 112. stav (3), u prvom redu, umjesto riječi "**3 (tri) dana**", pišu se riječi:

"**24 (dvadesetčetiri) sata**".

Član 21.

Zadužuje se Komisija za propise i Statut Općinskog vijeća Stari Grad Sarajevo da, nakon stupanja na snagu ove odluke, sačini prečišćeni tekst Poslovnika Općinskog vijeća Stari Grad Sarajevo.

Član 23.

Ova Odluka stupa na snagu osmi dan od dana objavljivanja u "Službenim novinama Kantona Sarajevo".

Broj 02-49-336/17
Maja 2017. godine
Sarajevo

Predsjedavajući
Općinskog vijeća
Stari Grad Sarajevo
Mr. sc. **Jusuf Pušina**, s. r.

Na osnovu člana 25. Statuta Općine Stari Grad Sarajevo - Prečišćeni tekst ("Službene novine Kantona Sarajevo", broj 20/13), člana 120. do 123. Poslovnika Općinskog vijeća Stari Grad Sarajevo ("Službene novine Kantona Sarajevo", broj 23/14 i 48/16), Općinsko vijeće Stari Grad Sarajevo, na sjednici održanoj 30.05.2017. godine, na prijedlog Komisije za propise i statut, za davanje autentičnog tumačenja člana 17. stav (1) tačka 1.3. Odluke o dodjeli u zakup poslovnih zgrada i poslovnih prostora Općine Stari Grad Sarajevo i rasporedu poslovnih djelatnosti na području Općine Stari Grad Sarajevo ("Službene novine Kantona Sarajevo", broj 7/16, 16/16, 21/16 i 15/17), iniciran od strane Službe za privredu i finansije Općine Stari Grad Sarajevo, daje sljedeće

AUTENTIČNO TUMAČENJE

ČLANA 17. STAV (1) TAČKA 1.3. ODLUKE O DODJELI U ZAKUP POSLOVNIH ZGRADA I POSLOVNIH PROSTORA OPĆINE STARI GRAD SARAJEVO I RASPOREDU POSLOVNIH DJELATNOSTI NA PODRUČJU OPĆINE STARI GRAD SARAJEVO

1. Članom 17. stav (1) tačka 1.3. Odluke o dodjeli u zakup poslovnih zgrada i poslovnih prostora Općine Stari Grad Sarajevo i rasporedu poslovnih djelatnosti na području Općine Stari Grad Sarajevo ("Službene novine Kantona Sarajevo", broj 7/16, 16/16, 21/16 i 15/17), je regulisano da:
"(1) Poslovni prostori se mogu dodijeliti neposredno, bez javnog oglasa, sljedećim korisnicima:
1.3. klubovima vijećnika koji učestvuju u radu Općinskog vijeća i parlamentarnim političkim strankama za obavljanje osnovne djelatnosti."
2. Odluku o dodjeli u zakup poslovnih zgrada i poslovnih prostora Općine Stari Grad Sarajevo i rasporedu poslovnih djelatnosti na području Općine Stari Grad Sarajevo je donijelo

Općinsko vijeće Stari Grad Sarajevo, kao provedbeni akt u okviru isključivih prava i dužnosti Općine.

3. S obzirom da je odredbom Odluke, navedenom u tački 1. ovoga tumačenja, utvrđeno da se poslovne prostorije dodjeljuju "klubovima vijećnika koji učestvuju u radu Općinskog vijeća", nastavak teksta se, također odnosi na stranke koje su parlamentarne i učestvuju u radu Općinskog vijeća, te se ne može odnositi na stranke koje su parlamentarne na višim nivoima vlasti.
4. Autentično tumačenje predstavlja integralni dio teksta Odluke o dodjeli u zakup poslovnih zgrada i poslovnih prostora Općine Stari Grad Sarajevo i rasporedu poslovnih djelatnosti na području Općine Stari Grad Sarajevo i objavit će se u "Službenim novinama Kantona Sarajevo".

Broj 02-49-330/17
Maja 2017. godine
Sarajevo

Predsjedavajući
Općinskog vijeća
Stari Grad Sarajevo
Mr. sc. **Jusuf Pušina**, s. r.

Na osnovu člana 44. i 57a. Zakona o pravobranilaštvu ("Službene novine Kantona Sarajevo", broj 33/08 - Prečišćeni tekst, 7/12 i 44/16) i člana 25. Statuta Općine Stari Grad Sarajevo ("Službene novine Kantona Sarajevo", broj 20/13), Općinsko vijeće Stari Grad Sarajevo, na sjednici održanoj 30.05.2017. godine, donijelo je

ODLUKU

O PRAVOBRANILAŠTVU OPĆINE STARI GRAD SARAJEVO

I - OPĆE ODREDBE

Član 1.

Ovom Odlukom utvrđuje se nadležnost i način rada Pravobranilaštva Općine Stari Grad Sarajevo (u daljem tekstu: Pravobranilaštvo), propisuje postupak za imenovanje, smjenjivanje i prestanak rada pravobranioca, zamjenika pravobranioca i uređuju druga pitanja u vezi sa radom Pravobranilaštva.

Član 2.

Pravobranilaštvo vrši poslove pravne zaštite imovine i imovinskih interesa Općine Stari Grad Sarajevo (u daljem tekstu: Općina), općinskih organa uprave i drugih institucija čiji je osnivač Općina.

Pravobranilaštvo vrši i druge poslove određene zakonom.

Član 3.

Općinske službe za upravu, posebne stručne službe / sektori (u daljem tekstu: općinske službe) i njihovi uposlenici dužni su da pravobraniocu neodložno dostave spise i obavještenja, odnosno pruže podatke i objašnjenja koja Pravobranilaštvo zatraži.

Ako zbog nepostupanja, odnosno neblagovremenog postupanja općinskih službi iz stava 1. ovog člana nastupi šteta za Općinu ili druge subjekte koje zastupa, Pravobranilaštvo o tome obavještava Općinskog načelnika i podnosi mu zahtjev za pokretanje disciplinskog postupka radi utvrđivanja disciplinske odgovornosti lica koje je bilo dužno postupiti po zahtjevu Pravobranilaštva.

Općinski načelnik obavezan je pokrenuti postupak iz stava 2. ovog člana i o postupanju po zahtjevu Pravobranilaštva za pokretanje postupka utvrđivanja odgovornosti kao i ishodu pokrenutog postupka obavijestiti Pravobranilaštvo, koje je dužno protiv lica za koje je utvrđena disciplinska odgovornost podnijeti zahtjev za naknadu počinjene štete.

Član 4.

Pravobraniocu i zamjeniku pravobranioca izdaje se službena legitimacija.

Službenu legitimaciju izdaje Općinski načelnik u skladu sa propisima Ministarstva pravde i uprave Kantona Sarajevo.

Član 5.

Pravobranilaštvo ima pečat u skladu sa Zakonom o pečatu Kantona Sarajevo ("Službene novine Kantona Sarajevo", broj 3/09 - Prečišćeni tekst i 36/12).

Sjedište Pravobranilaštva je u Sarajevu, ulica Zelenih beretki broj 4.

II - NADLEŽNOST I ORGANIZACIJA PRAVOBRANILAŠTVA

1. Nadležnost Pravobranilaštva

Član 6.

U vršenju poslova zastupanja Pravobranilaštvo je ovlašteno dapreduzima sve radnje koje preduzima stranka u postupku.

Ako Pravobranilaštvo smatra da treba pokrenuti određeni postupak ili da treba povući tužbu ili da ne treba izjaviti određeni pravni lijek, obavještava o tome općinsku službu od koje je dobilo podatke.

Ako se postigne saglasnost u mišljenju ili ako općinska služba ne odgovori u određenom roku, konačnu odluku donijet će Pravobranilaštvo, uz prethodne konsultacije sa Općinskim načelnikom, i o tome obavještava općinsku službu iz stava 2. ovog člana.

Član 7.

U postupku donošenja općih akata kojima se uređuju imovinsko-pravni odnosi, prava i obaveze prema stvarima u vlasništvu Općine, obavezno se pribavlja mišljenje Pravobranilaštva.

Prije zaključivanja ugovora o kupoprodaji, zamjeni, zakupu, prenosu prava privremenog ili trajnog korištenja, ugovora o građenju i udruživanju sredstava za građenje, kao i drugih ugovora kojima se pribavljaju stvari ili raspolaze stvarima, odnosno pravima, obavezno je pribaviti mišljenje Pravobranilaštva.

Prije zaključivanja ugovora imovinsko-pravne prirode iz stava 2. ovog člana općinske službe su dužne pribaviti i saglasnost Općinskog vijeća, u skladu sa Ustavom Kantona i zakonom, a ukoliko na te ugovore nije pribavljeno mišljenje Pravobranilaštva, Općinsko vijeće neće ih ni razmatrati.

Kada je predmet ugovora iz stava 2. ovog člana, pokretna stvar ili pravo čija vrijednost ne prelazi 10.000,00 KM nije obavezno pribavljanje mišljenja Pravobranilaštva, niti saglasnost Općinskog vijeća.

O ugovorima zaključenim bez prethodno pribavljenog mišljenja Pravobranilaštva iz stava 2. ovog člana, Pravobranilaštvo obavještava Općinskog načelnika i podnosi zahtjev za pokretanje disciplinskog postupka radi utvrđivanja odgovornosti lica koje je bilo dužno pribaviti mišljenje Pravobranilaštva.

Općinski načelnik obavezan je pokrenuti postupak iz stava 5. ovog člana i o postupanju po zahtjevu Pravobranilaštva za pokretanje postupka iz prethodnog stava, obavijestiti Pravobranilaštvo.

Član 8.

Pravobranilaštvo daje Općinskom vijeću i općinskim službama, na njihov zahtjev, pravno mišljenje o imovinsko - pravnim ugovorima koje namjeravaju da zaključe sa stranim pravnim i fizičkim licima, kao i o drugim imovinsko - pravnim odnosima sa tim licima.

Član 9.

Tražena mišljenja iz člana 7. stav 1. i 2. ove Odluke, Pravobranilaštvo je dužno dostaviti u roku od 15 dana od dana prijema zahtjeva i potrebne dokumentacije, a u naročito složenim slučajevima u roku od 30 dana.

Član 10.

Zaključeni ugovori imovinsko - pravne prirode obavezno se dostavljaju Pravobranilaštvu u roku od 15 dana od dana zaključivanja.